

郵風詩社
吟集

題 鄒從恩



郵風詩社吟集第一集目錄

郵風詩社同人吟集初稿詩序

郵風詩社簡章

郵風詩社題詞

郵風詩社祝詞

郵風詩社社員自傳

郵風詩社課題

郵風詩社社員自由作題

李白甫先生五十初度唱和集

郵風詩社同人吟集初稿詩序

蓋聞聲應氣求。益友得他山之助。聆音識曲。良朋動流水之思。是以詩有伐木之章。易稱蘭臭之句。自古已然。而今尙矣。適值序屬秋中。白帝肅風雲之氣。時當凱奏。黃炎慶牧馬之年。永詠昇平。喜河山之再奠。狂歌勝利。慶日月之重光。開五千年歷史未有之殊榮。樂四百兆人民共同之幸福。表揚勳蹟。端賴詩歌。照耀簡編。尤當詠頌。正我同人建國修文之候也。

爰有西蜀詞人。號稱才子。郵壇碩彥。俱係名流。憫國粹之夷陵。抱斯文而自惜。振臂一呼。清醒塵寰迷夢。高歌幾闕。吟哦華夏正聲。擊鉢催詩。門吟賸於月下。舉觴分韻。吐珠玉於雲中。固已名重溫邛。羣呼詩伯。騷壇李杜。共仰詞宗者矣。此郵風詩社之所由緣起也。

或者謂當今之世。醫工，電化，科學昌明。詞曲，詩章，縉文幻想。而於建國開始之時提倡之。無乃不識時務者乎。余曰否。科學固爲建國之良圖。詩文亦爲當時匡正人心之妙劑。二者相得益彰。並行不悖。況本社之主旨。在同人工作餘閒。作詩句之推敲。爲文章之月旦。陶冶性情。鍛鍊品格。以文會友。以友輔仁。無東林政治植黨之圖。有蘭亭觴詠修禊之樂。較之今日社會一般歌場狐舞。紙醉金迷。豪博傾家。呼盧喝雉。豈不有霄壤之別耶。

雖然，余因有感焉。憶余六載軍郵，墮於龍華小劫，廿年輪鐵。證茲碧海青萊。只以王戴忘機。未

知迎送。阮壺疏懶。不解趨承。遂致潦倒郵場。十年不進。濫竽門下。一事無成。歷黃楊厄運之悲。作白首窮途之哭。青燈作伴。紅淚沾襟。感身世之飄零。歎斯文之掃地。已非一日矣。

每當下值歸來。一編在手。吮毫染翰。不減少壯風流。飲酒吟詩。尚有狂奴故態。今幸淹留蜀地。僑居益州。勝友如雲。座上之杯常滿。朋簪似雨。文會之日無虛。攜文則珠玉盈箱。聯句則風雲滿紙。借太白之筆以題詩。誦相如之文以織句。造工部之草堂。詩懷愈遠。拜武侯之祠廟。哀感難禁。追尋遺跡。洪度之井瑩依然。憑吊芳蹤。文君之酒爐宛在。緬企巫山雲雨。香夢荒唐。思維劍閣縈迴。淋鈴淒切。或詠峨眉之雪。或看玉壘之雲。或把酒而問青天。或騎驢而冒細雨。不知境之何以至。情之何以深也。

余於倭人歸降後一月。招飲郵局七八同人於成都北門大安樓。成立郵風詩社。是日也。天爽氣清。風高日晶。新知舊故。咸稱歡樂於一時。好句奇文。敢冀流傳於萬世。是爲序。時在民國三十四年十月四日黃岡李翔雲謹撰於成都湖廣會館。

郵風詩社簡章

(一) 名稱 本社定名為郵風詩社

(二) 宗旨 本社同人以利用公餘時間闡揚詩教發煌郵德為宗旨

(三) 社員資格 凡中華郵政員工無論現在何地不分性別等級但須品行純潔無不良嗜好者凡願參加本社者經郵政員工或本社社員二人介紹均得為本社社員

(四) 組織

甲 社長及副社長 本社選社長一人綜攬本社一切事務副社長一人贊襄正社長協理一切事務正副社長均有核閱取捨刪改社員稿件之權本社對外一切文件由正副社長任何一人署銜行之正社長因故缺席時其職務由副社長代理之正副社長之外得聘請國內宿學名儒為本社名譽社長

乙 總務組 設總幹事一人幹事一人辦理撰繕本社一切詩文稿件并負責通知召集社員聚會及社內有關各事

丙 編輯組 設總幹事一人幹事一人收彙各社員每次詩課稿件經正副社長核閱修改後送國內學界名流題詞編印成冊分送各地及社員并保管稿件等項工作

丁 會計組 設總幹事一人經管本社款項并綜理出納保管事務

戊 交際組 設總幹事一人辦理對外一切事務

(五) 社 費

分爲入社基金及臨時特別捐入社基金最低定爲法幣二千元由社員入社時一次全數繳足特別捐視當月集會及本社開支隨時由當地社員自足捐納必要時得向外募集所有各項繳款均交由會計點收掣取收據爲憑其在外區之社員除入社時繳納入社基金外不再繳納特別捐

(六) 集會及社址

本社暫定每月集會一次日期及地點經正社長或副社長決定後由總務組通知各社員本社社址暫設在成都湖廣會館第十號內

(七) 課 題

每次集會時由正副社長及社員等輪流命正副課題各一正課必作副課聽便如不願作副課時亦得自由命題以代副課凡三次不繳正副課題者即失社員資格

(八) 刊 冊

本社社員每次稿件有關文件及投稿等暫訂每季刊印一冊俟集彙較多時再籌資印行郵風同人集凡本社社員或非本社社員關於研究或評論詩詞之文學及詩歌詞曲等皆歡迎投入本社刊物但本社有刪改去取之權刊載與否原稿恕不退還

(九) 本社社章有未盡事項得隨時於月會時通過修改之

(十) 本社社章經社員通過後即生效力

郵風詩社題詞

劉存厚

蘭亭久陳迹。白社亦空留。勝事曠千載。流風到蜀州。賦同枚叟速。名擬鄭莊郵。平遠新都外。清詩一例收。

恭題郵風集錄塵同社諸君子

汪槃珠浦

鯉魚風急野棠稠。一雁高橫遠送郵。人浥芙蓉城上露。詞妍楊柳岸邊秋。一時詩酒圍蓮社。自古文章在益州。我比仲宣慚體弱。寥天暢望獨登樓。

題郵風詩社

野鶴

花信風和結蓋稠。幕天席地速傳郵。朱絲墨字興圖線。綠水青山驛路秋。木鐸東來新復社。金針南指古神州。鸞牋在我慚無用。用助諸君造鳳樓。

郵風詩社題詞

劉咸榮

發揚道義筆生花。吟聲直可通天聽。中和之氣滿乾坤。速於置郵而傳命。

前題

夏斗寅

草偃原須君子風。四維八德振愚蒙。流行願借郵傳速。盡納斯民入軌中。

郵風詩社吟集

六

前題

徐繼莊

舊學銷沉三十年。起衰今幸賴郵傳。嚶嚶鳴鳥聲求友。點點飛花座集賢。憂樂甯忘天下計。興觀且補蜀中編。好憑華國文章手。力挽狂瀾障百川。

前題

張恩澤

文章長痛世風摧。怒罵笑嬉莊亦諧。賴有鐵肩擔道義。忍將傲骨役形骸。龍蛇走筆風雲動。狐兔蕩形黑暗開。千古斯文留正氣。民孚國泰屬將來。

前題

樓祖詒

詩言志。歌永言。聲依永。律和聲。

前題

尹子超

詩以言志

前題

朱學範

發揚郵德

前題

韓大鏞

詩人靈感呼出大眾的聲音。

前題

顧錫章

時代的詩人，不是無病呻吟，而是有感而發。爲民主自由而吟詠，爲和平幸福而唱和，暴露黑暗，歌頌光明，是今日時代詩人的使命。

前題

苟清如

一切都在詩意中。

讀郵風詩社吟集書後

王智君

第一維新政。郵傳四海風。統籌全局善。餘暇學文工。建國詞章著。騷壇氣象雄。聯吟無遐邇。附驥效顰中。

郵風詩社祝詞

梁觀海

風騷墜緒，雅韻沉聲，追章琢句，寫我平生，老驥櫪伏，好鳥花鳴，郵風倡導，樂觀厥成，斯文重振，詩教闡明，置郵傳命，盛德流行。

前題

黃卓然

騷壇運歇感淒其。門艷矜華炫詭奇。大道幾爲荒草塞。論詩誰把玉衡持。鳳凰一唱驚天下。蟋蟀微吟傍海湄。昨夜雲開江上月。萬山低首禮峨眉。

前題

王啓新

吟壇久寂硯田蕪。幸得登樓振臂呼。紙貴洛陽行再見。社刊傳佈遍寰區。雅集欣聞月一回。保存國粹賴長才。西行我欲乘風去。也得濫竿末座陪。

前題

沁園春

郭光也

堪歎吾生，命豈乖離，誤落浮塵。念悠悠世路，茫茫人海，弱肉強食，笑傲精魂。夢死醉生，腐同草木，豈不輕輕負此身。這時代，好爭身貢獻，運更增新。當心。大敵如焚。看閃爍烽烟霧似雲。更沉沉隱隱，千般魍魎，紛紛亂亂，一望無垠。鏡下妖氛，原形畢露，菩薩手中容誰人。瘡痍甚，祝毛錐橫掃，拯救斯民。

前題

汪馥

歐風東漸，國學弗彰，喜新厭舊，詩教欲亡，承先啓後，亟待闡揚，爰集同志，相與提倡，風希蓮社，

韻繼三唐，神交文會，千里一堂，分題共賦，錦繡篇章，清新俊逸，富麗堂皇，風騷受領，水遠天長，雲蒸霞蔚，郵界之光。

前題 奪錦標

呂肇康

舊學銷沉，新潮澎湃，數十年來變革。八載胡騎直入，踏遍江南，破殘東北。問悲歌慷慨，寫世亂，誰爲妙筆。寢兵戈，羣怨興觀，正待青莪承絕。奮起郵風詩社，際會如雲，多少羣賢咸集。高宴，安樓上，草聖詩仙大座中之傑。啓騷壇盛事，導共負褒忠貶劣。賦昇平，傳命置郵，從此淑身華國。

前題

馬明初

我祝郵風。文化之鐘。聲聞遐邇。南北西東。
我祝郵風。藝術之宮。李白杜甫。是尊是宗。
我祝郵風。羣彥羣公。爲文之伯。爲詩之雄。
我祝郵風。德尙文工。移風易俗。世界大同。

前題 滿江紅

張光岱

社結郵風，當勝利騰歡初歇，憑妙筆雄心，聊託詠歌豐烈。河嶽長鐘靈秀氣，乾坤一洗光明月。喜良朋，大雅手扶輪，勤煥切！神州恥，已滄雪，瀛海寇，今覆滅。豈風人雅韻，獨教殘缺。要爲文章爭起濟，心花露放心聲血，直光芒輝煥達康衢，非蜃闕。

前題

楊國棟

風雅久陵替。郵曹結袂先。主盟欽草聖。導社仰詩仙。椽筆揮珠玉。騷壇集俊賢。清新匡善政。譯史永爭傳。

前題

蔡鏡堯

郵風組社，洵盛且美，彬彬先進，惠然蒞止，誼結苔岑，自憐痴嗜！惟此國教，漸就陵替，興觀羣怨，溫柔敦厚！管窺實罔，門戶標榜，世論臧不，豈曰敢非！蠡測斯謬，新固孔嘉，老宜彌茂，所冀德業，俾占无咎，亦冀自娛，韻多寬宥，非曰能之，匪躬譴陋。聊以假日，我手我口，啜醢哺糟，一篇百斗。永言放歌，嚶嚶求友，我友如何，咸推匠手，采采葳蕤，依依楊柳，俊逸清新，皆妙並秀。郵傳遍國，泱泱大地，壯遊可圖，採風問誌。良晨佳會，珠玉隨記，柳暗花明，俯拾皆是。老農樊圃，百工列肆，民間疾苦，社會正義。邪許聽歌，祈父呼成，啄黍黃鳥，伐檀豪吏，朱門臭肉，新豐柝臂，白雪關山，從軍壯志。都現筆底，却無邪思，正變中和，哀樂體備，是性情人，得太智慧，伯爾君子，何枝何求，既興於詩，亦游於藝，叨陪末席，巴人下里，攻錯他山，無我遐棄。

前題

羅仁明

社組郵風，詩懷白甫，兩哲超然，輝今耀古。珠玉流傳，銘心刻腑，直矯時弊，匪運斤斧，俗美化行，

327328

惟德是輔。郵風之作，語重心苦，允乃今日，道義杳無，舍本逐末，惡紫奪朱，異端蜂起，孰是楷模，引茲舊貫，當衆一呼，詩以言志，教化寓之，寄聲於樂，發言於詩，養育浩然，是曰常師，仁民愛物，榮顯由茲，於鑠郵風，丕哉所期！

郵風詩社吟集

郵風詩社社員自傳

馬明初以字行。別號趣園。四川成都人。原籍雲南太和縣。世守天方古敦。爲人和易。性癖書。遇名籍雖重價必購藏。喜讀詩。見古今名人詩詞佳者輒錄存。積若干冊。公餘展誦。欣然忘寢食。少從軍。有大志。常奮勇赴沙場殺賊。光復後。國勢未統一。軍閥互鬪。乃投戈從郵。歷任各地郵局長。又喜遊。足跡幾徧川東西南北。居恒以未登五岳。觀光京華。及泛舟西湖爲恨事。愛讀古今名人遊記。以當臥游。服務郵局迄今已三十餘年。同僚贈以萬日郵工印。詩稿尾每鈐蓋以自愉。現任西川郵政管理局營業組組長。與同寅組詩社。郵風其所命名也。敵詩主性靈天籟。間友人爲改易。敬奉爲一字之師。其虛懷若谷。不恥下問。有古人風。所作詩多新意。以氣韻勝。不貼貼於雕琢。洵詩中之白描派也。近垂老矣。將退休。卜居浣花溪畔。以娛晚年云。著有導江詩草。趣園吟稿各若干卷。

呂肇康。少小生長錦江湄，一半聰明一半痴，剪燭十年慙不學，浮生廿八百無知，曾經憂患常耽酒，不慣逢迎只詠詩，全活已遭離亂日，凱歌未見太平時，忍飄書劍從郵早，欲枕琯戈報國遲，儲愧班生心已拙，謀殊馮婦計安支，身當大亂恒思舞，目覩橫行每裂眦，一發奸頑舒衆恨，竟招尤怨惹人嗤，眼前大義洵難見，天下至公果莫爲，雲本無心云出岫，鳥因倦翮喜還枝，是非黑白今休問，南北西東任所之，惜別蓉城懷故雨，幸來滇海樂遊馳，忙尋崗位勤公務，暇訪湖山壯我思，管爾嫌情于底事，隨他皺水滿春池，淺斟低唱乘閑逸，但願讀書與讀詩。

王啓新浙江嵊縣籍。卒業於民義學校。任小學教員六七年。民八負笈海上。習蟹行文。十二年考取郵局。任包裏間售票員二十餘年。持籌握算。日與市僧傭保接觸。用非其才。故居恒鬱鬱不得志。公餘以詩酒自娛。常效灌夫之罵坐。且喜作方城戲。不知者皆目爲醉生夢死之日趨墮落者。實別有懷抱之傷心人也。聞郵風詩社成立。欣然加入。喜濁世猶有同調。恍如旅行沙漠者聚賭綠洲。於其無聊生活或能得一新方式焉。

吳煥字華清。原籍江蘇武進縣。先世宦遊來魯。卜居稷門。近百年矣。幼失怙。輟學入郵局服務會計股。垂十餘稔。性拙直無所嗜。唯於音韻之學輒復欣賞。此次加入本社。亦思就正高明之意。時年三十有九。

黃卓然字景文。福建莆田人也。幼而了了。長更便便。供職上海郵政管理局。性溫厚。重然諾。惟不耐繁華。公餘芸窗獨處。爐香一炷。書卷兩桁。怡如也。耽吟咏。苦無同好。以故聞本社徵求社員。毅然附驥。他山之石可以攻玉。是所望於諸同文也。

余楊姓。字國棟。籍隸蜀省之忠縣。幼失怙。賴母氏撫以成立。稍長出就外傳。歷中學而大學。離校後。即役軍政。橐筆勞形。樗庸自慙。嗣考入西川郵政管理局。謬承前西川會計股長（現本社名譽社長）樓公翼孫之青鑒。追陪吟席。勉爲學步。非敢言詩也。乙酉秋。本管理局李公白甫。張公義常。本風雅移俗之旨。雅集同寅先進多人。議組郵風詩社。余以菲材隨諸公後。觀摩匡正。獲裨良多。私心深自慶幸。於戲文章關於世運。余雖弗敏。敢不奮勉。謹抒短傳。藉以自勵云。

李翔雲一名仰杜。號白甫。湖北黃岡人。生於民國紀元前十五年。（公元一八九七）肄業于武昌文華大學校。民國九年考取郵局郵務員。曾任鄂晉陝各郵區重要職務。民國二十六年蘆溝橋事變發生時。在陝服務。二十七年日寇在晉勢甚猖獗。下太原。攻臨汾。逼晉南。有偷渡黃河進攻潼關之勢。時陝西潼關郵政局局長一職虛懸已久。無人敢任。適余至西安。即奉命長潼關郵局。其時日寇兇鋒囂張。席捲晉南。大有過風陵渡之勢。一日礮聲震天。隔河遙擊潼關車站。并用重轟炸機輪流狂炸。城內居民扶老攜幼。呼號奔走。自相蹂躪踐踏而死者累累。不堪入目。城內各機關撤退。余因城郊尚有國軍。郵政機構若遽撤退。于軍民均感不便。決不隨波逐流。放棄所職。乃率領全局數十員佐差工遷避于城北水家巷民房內。照常辦公。後因日寇佔黃河北岸高地。終日用排礮轟擊縣城。并用飛機狂炸。全城已成焦土。又移城郊鄉村辦公。如此危局。撐持半載。當日全城軍民及國內報章交相稱頌。是時日寇在山西各地猖獗異常。寇氛籠罩全境。我國健兒在山西冀北魯南各處遊擊者不下數十萬人。因聯絡中斷。不能通訊。前方士兵薪餉不能匯解贖家。後方報紙新聞及醫藥包裹亦不能到達前線。士兵苦之。政府令交通部轉令郵政總局設法維持遊擊區郵務。及匯兌交通。一時人選甚難。陝西郵政管理局長西蜜司以余在潼關頗著膽略。乃令負責攜大宗票款北渡黃河。辦理晉陝郵運。并協濟山西內地各級郵局。軍郵因而活躍。晉郵亦得暢通。與山西抗戰健兒日在槍林彈雨之中同甘苦。共患難。數次遇難。幾登鬼錄。不敢言功。在游擊區物資缺乏。人民逃竄。日不舉火。夜不安眠。飢則食生蔬野果。渴則飲山泉溝水。日馳驅山岳間。夜宿草露。不敢言苦。曾自咏云風沙鐵笛見精神。老去雄心不後人。却把神州三萬弩。借來一一射胡塵。草